



18. august 2022

UKA 2022/96

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Meeqqat atuarianni angajullerni inuussutissarsiutinut sammiveqartut atuartitsissutitut neqerooruteqarsinnaalernissamik periarfissiisinnaaneq pillugu Naalackersuisut UKA2023 nallertinnagu nalunaarusioqqullugit aalajangiiffigisassatut siunnersuut.**

(Inatsisartunut ilaasortaq Aqqalu C. Jerimiassen, Atassut)

### **Tungavilersuut**

Inuk kinaluunniit imminut napatissinnaanngornissaa imminullu pilersortunngornissaa Atassummi kissaatitta annersaaraat.

Allat partiit eqqartortapaat nuna nammineertoq, uagulli Atassummiit inuk nammineertoq samminerorusuttuaannarparput. Inuummiuna nammineertup aatsaat nunaqqatini tamaasa sunniuteqarfigilluarsinnaagai. Tikkuinnarlutami nuna nammineernerarniarutsigu sumilluunniit nikeriaatissaqannginnatta, oqaasiinnassammata asuli silaannarmut aallarartitat.

Meerartagut meeqqat atuarianiinnerminniilli sinnattorisinnaalereertariaqarpaat, inersimasunngorunik namminersortunngorsinnaajumaarnertik. Naak ilinniarluarsimasut naammassisartut amerliartornerat nuannaarutissaasuaannartariaqaraluartoq, qaffasissumik ilinniarsimallutik naammassisut amerlanerpaartaat pisortani qaffasissumik akunnattumilluunniit inissinnissaat ilimanaateqarnerukkajuppoq.

Atassummiit isumaqarpugut, tamanna meeqqat atuarianingaanniilli eqqarsartaaseq mumikkiartuaarneqalereertariaqartoq, meerartatta takorloorsinnaalereertariaqarpaat imminnut pilersorlutik napatittunngorsinnaalerumaarnissartik pisortanik isumalluuteqaratik.

Sumiiffinnilu ataasiakkaani taamaallat inoqarfinni annerusuni sukkanerusumik ineriartornerup allanngoriartulersinnaanera ilimanaateqarsinnaalluarpoq. Inuussutissarsiornikkummi tungaviusunik paasisaqarsimanikkut, pinngitsoorani sunniuteqarsinnaamat, ilinniaqqilernissami qanoq inuunermi tunaartaqarluni ingerlariaqqinnissamat.

Pisortat inuiaqatigiit napatissanngilaat, inuiaqatigiilliuna pisortat ingerlaannarnissaat tungavilertussaagaat. Meeraq systemikkut utaqqiinnartunngorsassanngilarput, meeraq siunissami nammineq imminut napatilersinnaanissaanik imminut upperisinnaasunngortissavarput.

Nunarput maanna ukiuni makkunani eqqarsaatigissagaanni, immaqa nunat allat isaanniit kommunistiskiusutulluunniit taaneqangajassinnaavoq. Tassami suliffeqarfiit annerpaat tamangajalluinnarmik pisortanit pigineqarmata, imminullumi napatittunngorsarniarnissamik eqqartuisarniarutta, tamanna siunertamigut imminut assortorpoq, muminganik inissisimalertariaqartoq Atassummiit isumaqarpugut.



Meeqqat atuarfiani nutartereqqinnitsigut sunarujussuaq meerartatta siunissaanut sunniuteqartissinnaavarput.

**Aningaasatigut ingerlatsinikkullu pisortanut kingunerisassai:**

Nalunaarusiornissamut piffissaq atorneqartussaq ukiup ilivitsup iluaniissinnaanissaa naatsorsuutigineqassaaq. AC-fuldmægtigellu ukiup ataatsitut sulineratut naleqassalluni 500.000kr.

**Namminersortunut aningaasarsiornikkut allaffissornikkullu kingunerisassai:**

Soqanngilaq.

**Innuttaasunut aningaasarsiornikkut allaffissornikkullu kingunerisassai:**

Soqanngilaq.